



« NOFIDIN'ANDRIAMANITRA ISIKA MBA HIRAHINY »

Ry Kristianina havana, tamin'ny Alahady tsotra faha-14 mandavantaona lasa teo isika nibanjina an'i Jesoa teo anivon'ny mpiray tanindrazana aminy kanefa tsy nahay nandray azy izy ireo na dia nitolagaga aza tamin'ny fahaizany niteny ka nahatonga an'i Kristy nanambara fa tsy misy mpaminany tsy heninkaja hafa tsy amin'ny taniny sy ny fianakaviany ihany. Araka ny voalazan'ny Evanjely ao amin'i Md Marka dia tsy nanao famantarana firy i Jesoa tamin'ny tanindrazany. Izany dia mitranga koa amin'ny fiainantsika andavanandro ka nahatonga antsika nandinika na dia maro aza ny fanenjehana sy fanaratsiana dia tsy maintsy mijoro ho vavolombelona isika ary manana modely isika amin'izany dia ny olontsambatra Lucien Botovasoa.

Fantantsika ny nanjo azy. Maninona ary isika no tsy maintsy mijoro ho martyry ? Ny dikan'ny martyry dia vavolombelona. Nofidian'Andriamanitra isika fa indrindra

amin'izao fotoan-tsarotra iainantsika izao satria mila antsika Andriamanitra mba hirahiny hamboly tontolom-pinoana ka hivelaran'izany finoana izany eo amin'ny fiainantsika izay mahatonga antsika ho génération mpanorina tokoa indrindra amin'izao fiatrehantsika ny

Vakiteny I : Amôs. 7, 12-15

Tononkira : Salamo 61

Vakiteny II : Efez. 1, 3-14

Evanjely : Mk. 6, 7-13

filankevitra pastôraly izao dia tena mifanaraka amin'ny ataontsika ny vakiteny atolotry ny Eglizy androany Alahady faha 15 izao. Mandavantaona tokoa fandalinam-pinoana fa tsy hoe indraidray ary tsy maintsy ataontsika izany ka mahatonga antsika miatrika ny filankevitra pastôraly izao.

Tsy misy kisendrasendra ao amin'Andriamanitra satria ireo vakiteny telo androany dia tena manambara ny maha iraka antsika. Ao amin'ny vakiteny voalohany mitantara ny fiantsoana an'i Amaosy izay nilaza fa tsy natao ho mpaminany izy satria mpiandry ondry no asany ary tsy manana talenta hanatanteraka an'izany izy, *"Tsy mba Mpaminany aho na zanaky ny Mpaminany; fa mpiandry omby sy mpamboly aviavy"* kanefa izy no nofidin'Andriamanitra. Toy izany koa isika izay solon-tena amin'ny filankevitra pastôraly izao dia nantsoin'Andriamanitra hanatanteraka an'izany na pretra na eveka na voatokana na lahika ary maro an'isa ianareo lahika, azo lazaina fa voalohany amin'izao faha-60 taona ny arsidiosezy izao filankevitra pastôraly izao ka anaovantsika dingana vaovao. Isika no misionera amin'izao fotoana izao, isika no tsy maintsy hirahina hanorina Eglizy Olona Velona, Eglizy Tranon'Andriamanitra tahaka an'i Amaosy, isika no mpaminany. Ny dikan'ny mpaminany tsy hoe mahatsinjo ny hoavy, marina mety ho izany tokoa fa ny maha-mpaminany indrindra dia izy manambara ny sitrak'Andriamanitra izany hoe amin'izao filankevitra pastôraly izao hiaraka hikatsaka ny sitrak'Andriamanitra isika, hivavaka sy handalina ny finoantsika ka hiaraka hahalala ny sitrak'Andriamanitra maniraka antsika isika tahaka an'i Amaosy amin'izay afaka hiaina ny maha génération mpanorina Eglizy Tranon'Andriamanitra sy Eglizy Olona velona antsika. Tsy ho tanteraka izany raha tsy mitoetra ao amin'i Jesoa isika ary hitoeran'i Jesoa koa satria isika manorina dia te- hamokatra tsara mba ho feno ny hafaliantsika. Izany no halalinintsika amin'izao Alahady faha-15 izao.

I Md Paoly ao amin'ny vakiteny faharoa kosa amin'ny taratasiny ho an'ny Efezianina dia manambara amintsika fa hatramin'ny naharian'izao tontolo izao Andriamanitra dia efa nifidy antsika ho oloaraiky ao Aminy *"mba ho masina sy tsy manantsiny eo anatrehany isika"*, fanorenana Eglizy fianakavian'Andriamanitra izany ary irintsika ~~ho~~ an'ny fianakaviansika tsirairay mba ho Eglizy tokoa itoeran'Andriamanitra ka hahalalantsika ny sitrak'Andriamanitra.

Aminy alalany sy ao aminy ary miaraka Aminy no anorenantsika ny fiainantsika. Izany no hahafahantsika hitondra an'I Kristy eo amin'ny mpiara-belona ka hanova an'izao zava-misy tsy araky ny sitrak'Andriamanitra eo amin'ny fiainantsika izao, eo anivon'ny fiaraha-monina. Maro ny zavatra mahakivy antsika ka isika Kristianina no manana adidy satria irahin'i Kristy isika tahaka ny voalaza ao amin'ny Evanjely, tsy hoe tsiroaroa fotsiny fa isika rehetra.

Ny tsiroaroa voalaza eto tsy hoe hifampitsikilo fa manambara ny fiaraha-miasa, ny fiombonana amin'izany fitoriana izany mba hanova ny zava-misy ratsy iainantsika. Izany no fanorenana, tsy amin'ny alalan'ny fanapotohana na fanilikilihana na fanaratsiana fa amin'ny alalan'ny fanaovana ny soa. Izany ny antom-pisian'ny fikambanana masina, firohotana, vondrombavaka, vaomieran'asa maniraka antsika hirotsaka sy hikatroka ary hanompo izy ireny fa tsy fisehoana ity ivelany fotsiny sanatria. Izany no tian'i Kristy ambara amintsika amin'ny fanirahana tsiroaroa voalaza tamin'ny Evanjely. Ary hoy koa izy tamin'izy ireo: *"Ka naniraka azy tsiroaroa, sy nanome fahefana azy handroaka ny fanahy maloto.....Na aiza na aiza alehanareo, dia*

mitoera amin'izay trano hidiranareo ambara-pialanareo. Ary raha misy tsy mampiantrano na tsy mihaino anareo, dia mialà ao ka ahintsano ny vovoka amin'ny tongotrareo ho fiampanana azy". Tsy fanilikilihana izany fa fanajana azy ireo, tsy hoe fanaratsiana raha manao an'izany fa hanambarana fa tsy nandray izy ireo ka ny tsiny ho azy ireo tsy nanatanteraka ny adidy. Tsy maintsy manorina isika io ilay ambaran'i Md Paoly hoe "*Mitoria na amin'ny fotoana na tsy amin'ny fotoana*", ambaran'i Jesoa ny fomba fitoriana. Ka amin'izao Alahady faha-15 taona mandavantaona izao izay hanatanterahana ny filankevitra pastôraly, irintsika hanome toro-làlana hanampy antsika mba hivahatra tokoa ny finoantsika. Ny dinika vokat'izao filankevitra pastôraly izao, hitondra antsika amin'ny fanorenana tontolom-pinaona satria mila tontolom-pinoana isika. Ny tontolo iainantsika dia tsy mifanaraka amin'ny finoana izany ka zary mifanapotika sy mifanaratsy isika ka ny Eglizy avy aza no voazongozona. Ny fomba hitoriana ny vaovao mahafaly no ambaran'i Jesoa antsika :

Ny tena manandanja indrindra amin'ny ho entina mitory dia I Kristy, izy no fitaovana voalohany, aza mitondra na inona na inona eny an-dàlana, tsy mitondra na inona na inona raha tsy i Kristy. Tsy famoretana ny fitoriana ny vaovao mahafaly, tsy fanerena olona hanaraka firehankevitra fa fanambarana fitiavana, fanambarana vaovao mahafaly, fanambarana fanantenana sy fanorenana fianakavian'Andriamanitra dia fanorenana Eglizy Olona Velona, hikatsaka mandrakariva ny soa iombonana ao anatin'ny fampanjakana ny rariny sy ny hitsiny ka tsy hilaina ny fitaovana hafa ankoatrin'i Kristy vaovao mahafaly. Izany no ambaran'i Kristy amintsika. Izy koa izany no fitaovana tsy maintsy entintsika andalinana izao filankevitra pastôraly izao. Iza ary i Kristy amintsika ? mipetraka amintsika koa amin'izao ny fanontanian'i Kristy tahaka ny nametrahany azy tamin'ireo Apostôly. Iza i Kristy amin'izao taonjato hiainantsika izao, amin'izao faha-60 taona ny arsidiosezy izao, fitaovana inona no entintsika mitory an'i Kristy ?

"Ary noraràny tsy hitondra na inona na inona eny an-dalana izy ireo na kitapo, na mofo, na farantsa kely varahina amin'ny fehikibony, afa-tsy tehina ihany, fa ny tongotra no asiana kapa, ary tsy mitondra akanjo roa" Izy irery ihany no itokiso.

Izany no mahatonga antsika eto amin'ny diosezy milaza hoe tsy isika fa ny fahasovan'Andriamanitra miaraka amintsika. Izany no entintsika eny an-dàlana amin'ny fitoriantika ny vaovao mahafaly eny amin'ny toerana lalovantsika.

Nanambara koa i Jesoa hoe aza gaga isika raha tsy misy mandray satria tsy araky ny hevitr'izao tontolo izao no entintsika mitory ny fitiavan'i Kristy. Ny an'izao tontolo izao izay mivahatra amin'ny fanangonana, fandresena lahatra, ny antsika kosa manolotra fanantenana, fifankatiavana ary izany no entina hanorenana ny hoavy.

Hafatra fanaontsika matetika ny hoe niany ny hoavy fa tsy amaray fa indrindra ho an'ny tanora. Na dia eo aza ny fifandraisana mety manahirana dia mahatoky ny fahasovan'Andriamanitra isika ary mitory ny fibebahana. Raha tiansika tokoa ny fihavaozana sy ny fanavaozana, raha te hanavao isika ka handamina sy hanatsara ny fifandraisantsika amin'Andriamanitra sy samy olombelona ary amin'ny voaary dia aoka

isika tsy hifanaratsy fa hifanao soa. Izany no ambaran'i Jesoa amin'ny Evanjely raha niantso amin'ny fibebahana izy. Izany koa no anjaran'ny mpitory eo amin'ny fiainany andavanandro. Ny fiainantsika izany no hitarika ny olona hihavao, hiala amin'ny toetra mifanaratsy, mifampialona, miavonavona, ny fitiavan-tena izay mitondra amin'ny fanilikiliana sy fanapotehina amin'ny hafa.

Ry Jesoa Tompônay ô, mitaky finoana lalina sy fitiavana tsy resin'ny ratsy ny fijoroana ho vavolombelona. Manao filankevitra pastôraly izahay izao ka ampio mba hahay hanitatra ny fanjakanao tokoa, hahay hitory ny Vaovao Mahafaly ary indrindra hampijoro ny tontolom-pinoana sy hamboly azy ka hahatonga anay tokoa ho tena génération mpanorina Eglizy Tranon'Andriamanitra (ETA) dia ny tranonao ary hanorina Eglizy Olona Velona (EOV) eo anivon'ny fiainanay andavanandro. Ho zary génération macarios izahay hiadam-pinaritra ao aminao.

Ry Jesoa Tompo ô, ampio izahay hahay handray ny hafatrao ka hahay hampita azy amin'ireo mpiara-belona aminay ka tsy ho hisy intsony ireo voahilikilika ka tsy hanosi-bohitanana na iza na iza izahay fa ho fianakaviana iray ao aminao, ho Olo Araiky aminao. Amen

Mompera Arseveka Mgr Benjamin Ramaroson